

मार्निंग डोगरी न्यूज बुलेटिन, समें. 09.20 Hrs

<><><><><><>

Headlines

- राष्ट्रपति द्रौपदी मुर्मु होर शानदार उपलब्धियां हासल करने आहले 17एं बच्चें गी प्रधानमंत्री राष्ट्री बाल पुरस्कार कन्नै सम्मानित करडन।
- प्रधानमंत्री नरेन्द्र मोदी होर अज्ज नमीं दिल्ली दे भारत मंडपम च आयोजित होने आहले वीर बाल दिवस सरबंधी कार्यक्रमै च शामिल होडन।
- कटरा-रियासी ट्रैक पर कल रेल दी कामयाब आजमाइश नै कश्मीर गी रेल राहें मुख्य कन्नै जोड़ने दी उपलब्धि होर नेड़े लेई आंटी ऐ।
- जल शक्ति, जंगलात ते पर्यावरण मंत्री जावेद अहमद राणा होरें मेंटर दा व्यापक दौरा लाइयै केई डेलीगेशनं कन्नै मलाटी कीती ते आम लोकें दे मसले नबेड़ने दे निर्देश जारी कीते।

<><><><><><>

Prez. Bal Puraskar

राष्ट्रपति द्रौपदी मुर्मु होर अज्ज नमीं दिल्ली च 7 वर्गें च असाधारण उपलब्धियें आस्तै 17 बच्चें गी प्रधानमंत्री राष्ट्रीय बाल पुरस्कार भेंट करडन। पुरस्कार हासल करने आहले बच्चे 14 राज्यें ते केंद्र शासित प्रदेशें थवां न।

सरकार कला ते संस्कृति, बहादुरी, नमिं काहडें, विज्ञान ते टेक्नॉलॉजी, समाज सेवा, खेडू ते पर्यावरण दे खेतरें च बच्चें दी उपलब्धियें आस्तै बाल पुरस्कार भेंट करदी ऐ। ईनाम हासल करने आहले हर बच्चे गी तगमा, प्रमाण पत्र ते संदर्भ पुस्तिका दिती जंदी ऐ।

<><><><><><>

PM-Veer Baal Diwas

प्रधानमंत्री नरेन्द्र मोदी होर अज्ज नमीं दिल्ली दे भारत मंडपम च राष्ट्रव्यापी उत्सव - वीर बाल दिवस च हिस्सा लैडन। देशै दे भविक्ख दा निर्माण करने आहलें दे रूप च बच्चें गी सम्मानित करने लेई इस कार्यक्रम दा सरिस्ता कीता जा करदा ऐ। इस मौके उप्पर प्रधानमंत्री होर किट्ठ अगगे भाषण बी देडन। बरें 2022 च श्री मोदी होरें 26 दिसम्बर गी वीर बाल दिवस दे रूपै च मनाने दा ऐलान कीता हा। एह् ध्याड़ा गुरु गोबिंद सिंह जी हुंदे चार साहिबजादें दी दलेरी ते बलिदान गी सम्मान देने लेई मनाया जंदा ऐ। स्हाड़े संवाददाता नै खबर दिती ऐ जे इस ध्याड़े विकसित भारत दे निर्माण च युवाएं दे जोगदान पर ध्यान केंद्रित कीता जाहग। इस मौके उप्पर प्रधानमंत्री होर सुपोषित ग्राम पंचैत अभियान गी शुरु करोआडन। एहदा मकसद पोषण सरबंधी नतीजें च सुधार ते पोषण सरबंधी सेवाएं दी अमल-आवरी गी निग्गर बनाना ते एहदे लेई सामुदायिक भागीदार जकीनी बनाना ऐ। अज्जै दे कार्यक्रम च तकरीबन 3 जहार 500 बच्चे हिस्सा लैडन जिंदे च प्रधानमंत्री राष्ट्री बाल पुरस्कार कन्नै सम्मानित बच्चे बी शामिल होडन। वीर बाल दिवस दे महत्व गी उजागर करने लेई अज्ज केई सारे जागरूकता कार्यक्रमें दा सरिस्ता बी कीता जाहग।

<><><><><><>

Successful-Train

कटरा थमां रियासी आहले 17 किलोमीटर लम्मे रेल ट्रैक पर कल इंजन ते माल गड्डी गी चलाने आहली इक कामयाब आजमाईश पूरी कीती गई। उधमपुर-श्रीनगर-बारामूला रेल लिंक परियोजना दे इक हिस्से दे तौर उप्पर अन्जी खड्ड आहले रेल पुल पर बी कल एह आजमाईश कीती गई। इस बारे ब्यौरे सांझे करदे होई सरबंधत अधिकारिं दस्सेआ जे औंटी 5 ते 6 जनवरी गी कटरा-रियासी सैक्टर गी चालू करने दे मकसद कन्नै निरीक्षण आहले कम्म तोढ़ चाढ़े जाडन। एह सैक्शन, उधमपुर-श्रीनगर-बारामूला रेल लिंक परियोजना दा इक महत्वपूर्ण हिस्सा ऐ। एह निरीक्षण 5 जनवरी गी रातीं 8 बज्जियै 50एं मिंटे पर शुरू होग ते 6 जनवरी गी बड्डलै 7 बज्जियै 55एं मिंटे पर मुक्की जाहग।

<><><><><><>

Dy.-CM

उपमुखमंत्री सुरिंदर चौधरी होरें कल ननियाल नौशैहा च गुरुद्वारा यादगार संत बाबा सुंदर सिंह जी च संत बाबा सुंदर सिंह जी हुंदी 81मीं सलाना बरसी आहले कार्यक्रम च हिस्सा लैता। खरी मती गिनतरी च लोकें इस कार्यक्रमै च पूरे जोश ते आस्था कन्नै हिस्सा लैता। कार्यक्रम दरान गुरुद्वारा कमेटी दे सदस्यें, इलाके च बेहतर सिड़क राबते ते पानी सप्लाई दी जरूरतें पर जोर पाया। किट्ठ अग्गे भाषण दिंदे होई उपमुखमंत्री होरें कमेटी ते श्रद्धालुएं गी जकीन दोआया जे उंदिएं मंगें गी तौले शा तौले पूरा कीता जाहग। कार्यक्रम दा समापन प्रार्थना कन्नै होआ ते फही लंगर दा सरिस्ता बी कीता गेआ।

<><><><><><>

Akhnoor

अखनूर च महिला उम्मीद योजना ते बागवानी विभाग आसेआ समर्थित लौहके-लौहके बपारें दे राएं अपनी माली स्थिति गी मजबूत बना'रदियां न। एहदे बारें आप सहायता मूह दे सदस्यें दस्सेआ जे बागवाणी मैहकमे दे डरैक्टर होरें उनेंगी लौहकियां इकाइयां स्थापित करने लेई मार्गदर्शन दिता ऐ। उनें दस्सेआ जे उनें मसाल बनाने दा कम्म शुरू कीता जेदे करी उनेंगी बड़ा लाह हासल होआ। एह आप सहायता समूह दियां महिला कुट्टे दे मसाले, चटनी, मर्च पाउश्रर ते हल्दी जनेहियां शुद्ध जैविक चीजां बनाने च माहिर न। एह पैहलकदमी ना छड़ी उंदी रोजी-रूट्टी दा साधन बनारदी ऐ, सगुआं ग्रामीण उद्यमिता गी बढ़ावा बी देआ'रदी ऐ ते खित्ते दी महिलाएं दा सशक्तिकरण बी करा'रदी ऐ। स्हाड़े जिला संवाददाता कन्ने गल्ल करदे होई उम्मीद स्कीम दी इक वर्कर नै आखेआ।

<><><><><><>

Udhampur

उधमपुर दे टांडा पार्क च वन जीवन विभाग नै इस गल्ला गी यकीनी बनाए दा ऐ जे इनें दिनें पवा'रदी ठंड थमां राहत पाने लेई जनौरें गी गर्म थाहरां प्रदान कीतियां जान। उधमपुर वन जीवन रेंज दे अफसर महेश अबरोल होरें आखेआ जे हिरणें दी चेची तौरा पर दिक्खभाल कीती जा'रदी ऐ ते उनेंगी ऐसी थारें रक्खेआ जा रदा ऐ। स्हाड़े जिला संवाददाता कन्ने गल्ल करदे होई उनें गलाया।

<><><><><><>

Javed Rana

जल शक्ति, जंगलात ते पर्यावरण मैहकमें सने जनजातीय मामलें दे मंत्री जावेद अहमद राणा होरें कल मेंढर दा व्यापक दौरा लाइयें उथे आम लोकें दिएं समस्याएं ते विकास सरबंधी मसलें गी नबेड़ने लेई इक जनता दरबार लाया। इस मौके पर केई सारे डेलीगेशनं उंदे कन्नै मिलियें अपने मसले ते परेशानियां उंदे अग्गे रक्खियां ते उंदे तौले नबेड़े दी मंग कीती। इ'नें डेलीगेशनं च बक्ख-बक्ख इलाकें थमां आए दे आम लोकें ते बक्ख-बक्ख मैहकमें दे मुलाजमें दी शमूलियत आहले डेलीगेशन शामिल हे। इ'नें जेहड़े मसले, मंत्री हुंदे अग्गे रक्खे उंदे च कल्याण योजनाएं, सार्वजनिक सुविधाएं, पीने आहले पानी दिएं सुविधाएं, सेहत, सिड़कें, जनजातीय मामलें ते होर दुए विकास सरबंधी मामले शामिल हे। इ'नें मामलें गी धरोइये सुनने परैन्त मंत्री होरें उनें'गी जकीन दोआया जे उंदे जायज मसलें गी पक्क गै नबेड़या जाहग। मंत्री होरें सरबंधत अधिकारिं गी मौके पर गै निर्देश जारी कीते जे ओह अपने मैहकमें कन्नै सरबंधत मामलें दा संज्ञान लेंदे होई इंदे पर कार्रवाई जकीनी बनान।

<><><><><><>

BJP-MP

बीजेपी दे वरिष्ठ नेता ते राज्यसभा सांसद इंजीनियर गुलाम अली खटाना होरें बठिंडी जम्मू च इक जनता दरबार लोआया ते लोकें दियें दिक्कतें-परेशानियें बारै सुनेआ। सांसद होरें लोकें दियें बुनियादी दिक्कतें ते नौजवानें दी रोजगार सरबंधी समस्याएं गी तौलें हल करने दा यकीन दोआया। उनें गलाया जे सरकार नै जम्मू-कश्मीर दे पूरे-पराते विकास दी पक्क ध्याई दी ऐ।

उनें लोकें दी सेवा करने ते उंदे कन्ने सिद्धा संपर्क बनाने लेई इयै जनेह् कार्यक्रमें दा आयोजन करदे रौहने दा बी आश्वासन दिता।

<><><><><><>

Kishtwar

किश्तवाड़ दे मिनी सैक्रेटेरिएट आहले जिला प्रशासनिक परिसर च जिला स्तर दा इक कार्यक्रम आयोजित कीता गेआ जेहदा मकसद मुख्य भरै च 10 जहार बहुउद्देश्यी प्राथमिक कृषि दोआर समितिएं, डेयरी ते मच्छी पालन सरबन्धी सैहकारी समितिएं दे उद्घाटन दा जश् मनाना हा। इस कार्यक्रम दा सरिस्ता आईसीएआर नमीं दिल्ली च लोआए गेदे मुख कार्यक्रम दे मूजब गै कीता गेआ जेहदा च गृह ते सैहकारिता मंत्री अमित शाह होरें हिस्सा लैता हा। जिले च लोआए गेदे कार्यक्रम च नमीं पंजीकृत डेयरी ते मच्छी पालन सरबन्धी सहकारी समितिएं बी शिरकत कीती। एह सब्बै प्रतिभागी नमीं दिल्ली च आयोजित मुख समारोह कन्ने वर्चअल ढंग्गे कन्ने जुड़े दे हे। डिप्टी कमिशनर होरें इस मौके पर नमीं स्थापित कीती गेदी डेयरी सहकारी समितिएं गी प्रमाण पत्र बंडे ते अर्थबवस्था च सैहकारी समितिएं दे जोगदान दी सराहना बी कीती।

<><><><><><>